

桐梓縣志卷四十七

文徵下集

詩二

桐梓驛

李晉

郵亭斜對夜郎城寂寞空山冷旆旌一線羊腸低鳥語幾椽茅
屋度谿聲啼猿月下陳歌吹怪石峰頭學送迎幸有青蓮詩碣
在藤花遙映草風清

播川廢縣

使節翩翩次播川逢人休問漢唐前楊端西至無通塞宋室南
來有變遷山畔亭臺封茂草溪旁瓦礫漲寒煙廢興何事關飛
鳥偏向頽垣響杜鵑

重九宿綦江山莊

桐梓縣志

卷二十一 文徵志

一

重陽之夜宿山巔觸景縈懷倍悵然萬壑蛩聲擊半月一泓水
影劃荒田秦關已極登高地燕寨頻經落帽天何必茱萸看仔
細但呼村酒醉鄉眠

補宸熒公叔姪由貴筑歸潞州應試作歌送之

魁崖山頂一輪月婁山關前三尺雪月明雪積生晴煙二妙仙
仙忽言別別路由黔陟雲嶠春發南枝寒鵲噪武陵桃源次第
過虎渡荆門超濫到到時莫生翫心五溪銅柱蒼苔侵劉
家三雅誰賓主漢水長流自古今今人咸誦羊叔子岷山之碑
尙高峙平生愛讀杜家詩好好向襄陽尋故里武侯遺跡臥龍岡
鬱蔥佳氣春陵旁盛世陰符不足貴何必圮橋憶子房圮橋橋
畔青青草朝歌墨子迴車早便從灤水達潞安旋家具慶高堂
好君不見太史公北過涿鹿西崆峒江山氣入文筆雄又不見

青蓮翁錦袍綠杖隨西東五岳尋徧詩轉工君經楚蜀及三秦
山川文物詩料新讀萬卷書行萬里心胸開宏筆有神筆有神
兮奪天香起衰雄文震晉陽走馬赴金闕奏賦登明光明光殿
裏夙志伸泥金先報故園春念我離懷莫能釋平安應寄夜郎
人

扶歡埧

董淑昌

巖風淅淅度寒朝鷺馬遄征怯路遙夾樹枯藤常礙日滿溪新
漲並無橋獸人多住熊羆館鳥道時逢鴉雀苗傍晚欲尋投宿
處星星樵火出山腰

九龍溝

永川 李天英

日影不到處孤雲光破碎萬山同一照半嶺分顯晦九龍雖云
高偃蹇各有態後峯蜿蜒來偶與前峯會奔騰曳林木奮怒吸

桐梓縣志

卷二十一

文徵志

二

溝澮日午疾風吹鱗甲動虛籟

宿松坎

有引

時十月二十八日宿松坎適明府毛果亭贊府崔冲霞於役

駐此留飲達旦明日聯騎送僕酒店埒離思黯然作詩寄之

天風吹沙塵寒日遞隱見落日童僕饑逢人問村店路窮知己
盡何處投佳彥豈期黔蜀交復見故人面故人驚我至小樓重

開宴魚燔異味兼酢醢咄嗟辨果亭抱餘痛淚落如霜散點點

滴杯酒酸澁不可嚙

果亭時喪偶兒
遊抱沉疴

破涕強爲歡喧呼作拇戰

燭轉夜沉沉瓦白霜練練心知後會難疲茶不言倦清晨執我

手欲別還咨嗟崔郎喜聯鞍相送酒店埒直上二十里巖路縈

如巴一鞭策飛騎踏破霜中花擘弓落猿狖長嘯驚鹿麋意氣

盡所歷直欲凌蒼霞人生亦何常聚散如寒鴉我歸可計日明

年復京華君無立錐地直以官爲家相期各努力眼底千峯斜
曉發夜郎筭宿三坡脚

侵星發山頭畢景宿三脚經亘六十里岡巒相束縛跼步攀青
冥低心俯幽壑巖巖石壺關壁峭萬仞削縹緲開崇墉突兀向
寥廓淒淒聞斷猿瑟瑟聚寒籜緬懷謫仙人文藻肆噴礴一篇
蜀道難疑是夜郎作夜郎有劍門其險實相若回看海龍岡豈
能越黃鶴茫茫大江流東下潯陽郭慨想迫脅時千載事如昨
誰似郭汾陽贖罪解官爵苟無相士明急難安所託南登采石
樓記我此病瘡飄飄見遺像寒熱斗然卻朗吟五字詩對此供
一嘆余出幸黔陽時道經采石避瘧太白樓有識語也我才
不逮君遭逢誰怨薄魂兮歸來乎斗酒共斟酌
宿夜郎筭

桐梓縣志 卷二十一 文徵志

三

亂風回合帶斜陽客向雲中指夜郎鳥道盤空天一握馬蹄踏
葉樹千章箐深景短人心速風緊籬穿野店荒且買村醪溫凍
壓醉來不異在寬鄉堂居易

登貓山絕頂回至山家飲茶貓山即

李鳳翽

徑仄藤蘿合林荒石磴斜黃梁依夕照紅子漫晴霞茅屋幾椽
雅疏籬一犬譁山家欣客至老嫗煮新茶

題婁山關

王以純

雲峰壑樹望重重曾向當年起戰鋒七姓尙餘千載恨三關無
復一丸封專房不嬖田雌鳳破國何來李化龍自古禍胎多女
謁誰憐繡闥草茸茸

墜巖辭並序

趙毓駒

烈婦氏冉諸生梁郁山妻夫沒守義姑欲奪而嫁之烈婦度

不免佯言歸寧至虎跳巖乳其子付婢墜巖死時年二十二
南山石何纍纍妾心如山不可移吁嗟妾心姑不知解一長跪語
阿姑兒欲歸寧父母家別姑出門去孤兒啼啞啞兒聲甫住新
塚在路解二塚中人長眠塚上樹初茁憔悴經秋霜勁節不能殺
願爲連理棲鴛鴦不作倡條棲鳳凰解三高巖巖巖猛虎睨之不
敢越乳兒付婢與兒訣奮身投巖虎驚逸巖有時崩節不滅解四
夜郎懷古

李 楫

撐舟下夜郎載客訪遺事巖脚鎖荒煙樹根遮古字讀之不成
章酷日悲風厲吁嗟題石人都爲人所棄低首不復言默默憐
此意返棹泊河西陟彼南平治不見南平軍金戈和鐵騎當途
瓦礫荒愴然下遠淚昔爲官守城今爲牧馬地徘徊四弔之谷
口方風吹日午轉前溪悵斷謫仙至款步進禪堂蕭條雙古寺

桐梓縣志

卷二十一

文徵志

四

桐梓驛讀太白碑

李銘詩

梁州南盡夜郎天唐代長流李謫仙人惜金蓮辭院漏世傳彩
筆挂蠻煙開元勝迹埋幽草斗酒風流載舊編讀罷殘碑傷往
事空山暮雨正連連

三坡

傳道當年征播地馳驅百戰關叢岑連天峻嶺重重險而地長
雲日日陰高樹時聞黃鳥喚懸橋俯視碧流沉荒村沽酒逢遺
老猶倚閒筇話古今

按三坡又名滴淚三坡其險峻處名上天梯楊應龍拒劉省
吾吳三桂拒李固山皆於此設隘

桐梓驛道中

寸地高山力不勝樹陰時有好風乘緇袍喜逐晴光暖羸馬愁

經石骨稜蓐食荒城中夜起梯天折坂盡情登誰言歷落斜陽
道宿處峯巒高幾層

秋過夜郎懷太白二首

孤村小驛一遲留醉讀殘碑上古邱霜逼楓林呼斷雁雲收稻
隴臥羸牛車塵浪逐迷荒徑溪水滌洄送客愁稅駕未知何處
是空塵遺迹仰前修

靜聽松篁和好音石紋班駁老苔侵長年古道雲常護入望荒
阡草欲沈夕照橫過秋雁影西風吹送晚蛩心流連竟日供長
嘯千古誰憐幽憤深

夜郎箐

夜郎天外問途遙古箐霜程氣寂寥一尺長毛蕨虎過百圍大
木樹雞翹竹王舊墓從何識李白詩魂不可招日暮荒村無酒

桐梓縣志

卷二十一

文徵志

五

買月明醒眼倍蕭蕭

按夜郎箐在今縣師觀相傳爲竹王古城又竹王墓在今牛
心山下額曰漢七王墓相傳爲竹王父子之墳

萬人墳

趙協中

魁崖站前落日遲萬人墳上茲紛披楊曾纔定奢曾起都是明
家未造時

按魁崖站在魁山下播川驛前距硃砂橋僅里許相傳爲奢
崇明稱亂時京觀咸同亂後爲附近鄉人開墾種植土壟不
存迄今墾者已人亡戶盡矣

和金曰瑄採茶歌

趙大中

今年茶價定能兼穀雨方交夜雨添鄰舍相邀同採摘柔荑恰
似手織纖

四面梅花又竹林陽坡曉曬露宵侵芳辰令節欣相遇庶愜高人茗飲心

朝來採摘已勤勞焙輾忙忙又一宵淨汲井泉開水泡清香細細盃中飄

新茶初泡勿先嘗敬奉神前一瓣香解渴消煩非小可女兒又舉向耶孃

按金曰瑄字虞瑞乾隆丙子鄉舉官永從教諭享年九十著有採茶歌十首

會飲開雲堂高硯雲先生以長篇見示賦答 傅同形

我聞秦岱雲布族未抵九龍雲可掬斜飛半嶺暗平川彌蒼羣山漾朝旭童叟日日望開雲無計開雲徒局促有弟築堂雲忽開五色繽紛散山谷我以開雲名此堂敢擬韓公禱衡麓此地

茅土三朝錫帶礪河山作湯沐夜郎我久服先疇之水結廬食公餽移家復此置軒楹水繞山環面飛瀑圖書萬卷四羅列教子一經矯流俗清風時掃開雲階明月更照開雲塾開雲堂中有主人讀書養氣忘榮辱帶露晨收北陌禾披煙晚種南山菽縱目闌干盡變幻放情邱壑無拘束開雲堂上主人兄碌碌無奇孝先腹布袍竹杖課諸兒夕硯朝窗搜敝篋年來我媿俗塵羈餬口唇焦穎將禿去年策蹇下磁城解鞍彌月開雲宿弟勸兄酬未足奇砌下芝蘭可心目有客有客硯雲翁烹鮮曾試曹南牧又向黃河戰怒濤瓠宮能令蛟龍伏秋風忽動蓴鱸思拂衣遂買江陽舳歸來琴鶴伴逍遙浮舫齋中睡初足尋花問柳到開雲入門喜及西園菊對花飲酒興欲仙看竹敲詩句盈軸開雲得此生面開我欲和之穢形縮擬將正練倩王維貌就此

成巨幅上留餘素寫公詩裝潢懸之屋東屋

松坎舟中

古驛崎嶇盡清江曲折流遠尋桃葉渡更上木蘭舟燈火三家市煙嵐萬壑秋儻教從二客不讓長公遊

遊土城九龍壑

極天關塞入雲中不數秦關百二雄野樹多臨溪水綠山花猶是戟枝紅仰探石壁煙霄近俯看人家繡陌通回首當年平播事可憐今日止蒿蓬

按土城在仁懷廳俗稱薨城宋大觀三年於此建滋州領承流仁懷兩縣宣和三年廢州為武都城以仁懷縣為堡承流縣併入之理宗時豫章袁世明奉詔來平唐朝坵諸蠻留鎮其地遂居土城李化龍平播疏所稱上赤水里頭目袁年下

桐梓縣志

卷二十一

文徵志

七

赤水里頭目袁整皆其裔也

老少年

蘇公泗

非花却似花葉葉發奇葩曲繪高年者老而加倍華

按公泗官福建永福縣年八十致仕借老少年以自况老少年者天鮮米也

秋閨怨次令狐維遜元韻即效其體

楊世燾

病後桃腮漸覺殘醉聞疏雨捲簾看頻凋花蕊風逾冷斜剔銀鐙夜正寒南雁有書憔悴盡北堂無養指揮難幾回夢繞遼西路何日從容返繡鞍

按詩限一花二酒三名美人四曲牌五鳥六官七地名八藥名

婁山關

趙式謨

亂石依稀認老營五公祠外怒雲生破關頗藉鄉民力底事無人道姓名

按劉省吾攻婁山關頓兵其下險弗能克夜聞守關者簫聲
不絕令知音聽之乃教由柵木廠橫檐山間道而進劉故伴
攻其前以精兵襲其後遂入關後十里之白石口

留別曲陽父老

趙式訓

敢謂能留去後名祇應下考任陽城蒲鞭尙恐窮檐辱竹馬偏
爲祖道榮我與斯民原一體人從遠別見真情全家共信貧官
好風雨扁州夢亦清

道光戊子重宴鹿鳴

原作三首
遺錄四首

回首何年賦鹿鳴呦呦今又叶吹笙重來路熟蟾宮近一老科
同鶴夢驚日向壺中翻甲子身從局外厠蒿萃諸君莫笑龐眉
客認取編年證舊盟

化字嬉遊八十春微名薄祿老風塵毫無善狀酬恩遇剩有餘

年對選掄蕊榜新登觀國彥賢書舊引過來人歸田日近長安
遠好借公筵拜紫宸

樓臺一足偶爭先忽忽於今六十年敢謂康強稱壽耆仍從選
舉覆賓筵羞將白髮陪多士笑向青雲語衆仙瞬息鳳城春色
滿杏花紅處聽鶯遷

雙城書院送兒子子潤赴館作詩示之

傅代鐸

爲師亦識患非輕說命傳家重力行飯甑久艱吾獨舉硯田今
授子分耕教書苦勝讀書味老鳳清輪雛鳳聲莫似衰翁過半
百文章事業總無成

秋日田家

蘇敬商

田家無世情安居此茅屋西成得歲豐大滿篝車祝刈禾在芳
疇肩担往來速秋陽麗晴空健婦忙曬穀老樹出牆頭枳枒掛

生叔餘利肥雞豚曠閒放黃犢飲助及兒童暫解村中塾官租
既易辦新秫釀還熟招邀鄰舍人樽飲共徵逐絜量爾我耕各
種添幾斛

按敬商著有雙梧書館詩鈔六卷

七夕送別

曾廣涵

盧溝橋畔柳婆娑把酒臨歧喚奈何天上若還歡聚少人間休
怨別離多

開戴家溝河道感興次談震溪巡檢韻

溫綸沛

逐歲愁聽澤雁鳴夜來風雨夢魂驚鑿空正藉羣公重袖手剛
餘一不輕大業何須經我樹安瀾豈獨遂吾生休疑嬾惰貪行
樂教子耕田各有情

里人有賣酸棗至仁懷廳者戲呈蘇蓮舫廣文 趙鳴枝

桐梓縣志

卷二十一

文徵志

九

物本極尋常無如此間少其色類枇杷其形似羊棗花在夏荷
先熟較秋橘早其味甘而酸肉食固未曉性能消積滯咀之除
懊惱猶憶故園中手植任顛倒秋來纍纍黃橘取高枝裊蒸之
火候青暴以日色取其餘所棄者儘供烏雀飽何圖攜之來
此邦視如寶但以罕見珍楮相且勿考持贈故鄉人故鄉風
味好

重遊泮水感作

侯慎

賢門高廠曉烟沉絲竹升堂奏雅音何幸老年猶健在得逢舊
歲更登臨君恩已荷三朝渥聖澤還沾兩度深容貌雖衰冠未
改泮池清處照儂心

重遊泮水述懷

楊世煦

重見飛鴉集泮林時逢伏臘譜新吟梅開古洞煙霞媚樹老空

山歲月深白髮已增今日髻青春猶抱昔年心諸君莫笑藍衫
舊壁水從來幾再臨

黔中懷古

馮曰璋

井鉞參旗歷歷陳荆梁餘徽鬱狂榛山川鑿孔從莊躡人物開
荒有尹珍諸葛聲靈銅鼓壯高辛苗裔木皮新夜郎舊事難徵
實黃祐安能再細詢

州郡羈縻計自深三唐沿革尙堪尋來朝冠服圖王會謫宦文
章志藝林方幸五溪能獨護旋驚六詔忍相侵馬英王建空雄
長咫尺鄰封使陸沈

宋元而降漸安舒獻地頻頻走傳車玉釜畫邊歸撫馭革囊渡
後等驅除恩周奕女輸斑布威攝蠻王拜勅書隸楚隸滇兼隸
蜀貴州名始列方輿

桐梓縣志

卷二十一

文徵志

一〇

烏撒開通九驛長八千里外召奢香邊功已詠徠天馬廷議猶
聞棄鬼方行省諸公紛豹變末年羣盜又鴟張盤江關嶺依然
險徒悼梁王又桂王

登城晚眺

溫綸湛

雪痕班駁射寒曛閒倚城隍望暮雲天在山中無礙小風行水
上自成文趁墟叟醉歸仍緩出樹禽喧聚忽分好景當前儼圖
畫傳神欲倩李將軍

豺狗行

梁宗魯

此地開荒晚未及二百年傳言大箐林居處少人煙偶然有虎
豹藏避不敢前黎民歌樂土異昔泰山邊邇來地運醜當道遇
豺狗晝夜肆吞噬行人懼渴走或時哮深山或時馳原藪縱步
過高牆怒爪穿戶牖嗟哉總角兒慘矣耕樵叟風腥鴉亂啼蟻

聚血凝瓜

獸人九切跡也

鄉鄰併力追大嚼不絕口萬一趕得及止剩脚與手隔壁未曾埋前村又在吼勸君且達觀別方亦漸有

明月寺

明月明時寺無糧孝德香相傳任將軍名奇武藝強母思兒遠出盈盈淚眼傷眼盲心愛佛獨建觀音堂願目如月明虔拜向空王將軍告終養梵刹加嚴莊忠臣孝子心慈母目回光孝感達於朝嘉靖旌免糧將軍亦祝髮修到自然鄉慈悲心卽佛墓表寺東岡鼎革遭兵燹僧逃田並荒鄰占碑暗毀遠界失邊疆康熙世太平景運如陶唐士民報四恩三教廣宣揚天機和尚好善化復輝煌茂林老松柏脩竹圍門牆厥田多肥美積水治堰塘阿僧占福地教學有間房日暮聞鐘聲心熱轉清涼方翼長

桐梓縣志

卷二十一

文徵志

十一

洪都有方公振旅來川東那見此間洞刀鎗非所用半崖洞門開誰人能飛來崖邊鑿石孔巨纜垂鐵桶連珠火彈飛死士大逞威殲渠婦孺哭從寬不忍戮摩崖欲銘勳天上下將軍

犀牛口守隘謠

螺螄對面崖洞與洞相偶下上誠險巖遠將窄路守銃礮盛就藥戈矛執在手日間事樵炊夜令不絕口屈指年復年羈身久不久

去年方泡酒

俗謂婚安也

郎去堵隘口家家盡抽丁鴛鴦不敢偶回

顧虎跳巖冉氏名不朽盡節與盡忠古今亦常有權且滿一觴雄氣當赳赳但願遠近早清平無憂無慮同白首

定更更鼓開轉到二更來三更是夜半四更冷難捱直打到五更大家穿草鞋手提殺賊刀磨厲以須莫徘徊號火燒通夜處

處砍柴薪寺觀且徧伐墓宅更無分凄風凝鬼哭苦雨並傷神
巢傾卵弗存百鳥晚飛來聲聲哀叫不忍聞

樂捐

多捐樂本無少捐憂定有要千誰敢九百九求減觸怒加盤查
那管幾丁更幾口逃亡有示不許歸不逃人命賤如狗屢次軍
需稱樂捐曾是以爲樂民之樂否

站權

好官愛桐梓纍纍結成團桐梓戴好官雨露有餘歡多留桐梓
樹材木任隨刊指示造站權全屍尙非殘四柱高八尺頸枷手
復攀兩脚無所踏慘同魚上杆千聲百聲喊氣微溺未乾求速
今宵死苟延三日寒以茲誅大惡榜樣衆人看偷菜泊竊桶笞
杖嫌多端概作權中鬼聞說亦心酸法出五刑外辟比一錢寬

桐梓縣志

卷二十

文徵志

十二

亂絲從急治秀才初任官

四大砦

頂頭崖洞乾柏枝崖洞穿穿洞多水流乾洞少風癱黃木磴高
遮得寬緊要易行陳瓦山大亂來四處搬人和地利保平安
賀新婚集句

窈窕淑女華如桃李百兩迓之簫管備舉三星在戶式燕且喜
蒸昇祖妣施于孫子

厭厭良人婉如清揚纖纖女手稱彼兕觥既醉以酒載寢之牀
黽勉同心壽考不忘

納糧叟

趙旭

晨過縣門前有叟形可憐手持串票肩荷錢向人欲語先涕漣
家有薄田二十畝年年納糧按戶口昔時火號有定程官不累

民民恐後乙未議加徵日復一日隆隆升年年水患不緩徵一季薄收科派興小民雖至貧誰不知愛君小民雖至貧誰不知畏官果然倍取以供上挖肉補瘡亦允當外有吏胥收銀猛如虎內有廉從收穀賤如土親投守候既無期代納挪移終受侮可惜千難萬苦時長官身不爲糧戶田愈薄累愈多今若此後奈何老叟言甫畢我爲殷勤說但當安卑賤何須苦分別假如陽城爲債帥敢道催科力本拙又如宓子用私人心雖惠愛肘亦掣叟兮叟兮勿垂涕此邦尙少他邦弊正安仁懷告加糧似聞其人皆死亡

避水

避水如避兵見卽受荼毒避水如避債循蹤肆追逐陽侯何迫人萬家陷江濱自我居城市遭患不一足今年夏五月壬子值

十六連日大雷雨天地若翻覆濁浪湧山來較之奔馬速俄而過女牆倏焉漫山麓逃命雞犬竄踏波婦孺哭我急挈妻小濕衣儼出谷賴得賢廣文東頭分學塾泛濫乃未已人多頗局促南鄉有敝廬盍歸我邦族扁舟辭城頭荒涼驚滿目回環數十里汪洋一片綠紛紛避災民饑餒形瑟縮露處旣寒濕日中又蒸溽縱不填溝壑何由謀事畜沿途方感喟吾廬已遙曠舍舟度阡陌入門共慶祝微倖脫苦海豈敢厭郵俗夜來坐月明痛定痛更篤慨念桐梓縣建置本危蹙一城裹羣嶂水苦無歸宿地勢實使然天心固非酷往者壽國山有穴已鑿廟移開戴家溝萬金擲空谷繼開方家碕亦枉具畚揭人和得地利早享安瀾福機會一以失悔恨遂莫贖焉能有力家前功共思復競解杖頭錢或助困中粟誓剗山石平永免泥塗辱不見愚移山子

孫謀慮熟精誠感天帝頓為移王屋袖手委氣數諸君頗庸鹿
非無熱腸者卑賤得約束斯事關重大倡義賴民牧救災不揣
本徒賑撫卹粥禹稷彼何人饑溺縈心曲

守城

七晝八夜攻甚迫雲梯擋板兼礮石柴草稍礮廣堆積求救不
得通一隙官民婦孺心共赤以氣吞賊一當百賊旅若林分五
方四門後山我守南門賊尤強手持短劍立女牆鉛丸飛擊右臂傷
憤不顧身痛自亡大聲呼殺血裂創霧濛濛霜皎皎月暈昏日
光少時維乙卯十月杪廿二之日賊騎繞廿九解圍野火燎援
兵剛奪樓關曉初秋先已逆謀肇言者諄諄聽藐藐賊首鄒保神
曾么四劉然穆同高盛侯廷梁宗徐子陳登如蟬毛沿途裹脅民
繹騷僵尸纍纍填城壕傷者尤衆狐狸巧避豺狼逃但拾腐鼠

揮亂刀賊耶民耶爭釐毫是役也我親見文官誰劉署縣毅武
官誰王營弁把總明德教職蓋教諭樹典史王從九同督戰六十
兵三百練紳民堵禦久弗倦陣亡止三人受傷者殆徧公牘虛
實有天知作詩竊附忠義傳

破賊營

蹇君候選知縣死寺岡初十日池君候補千總死半山二十日賊膽較我

壯賊謀較我奸天時值寒沍地勢尤險艱坐此屢失機任賊自
往還兵驕將復怯義憤激市鬪男兒好身手中夜按刀環子月
戊子日二十九日清晨雨潺潺三路逼賊營死拒方當關奮勇拔其
柵突入矢石間乘勢徧縱火一炬天為殷斬馘及生擒來獻賞
同頒首逆雖在逃亦足警凶頑快飲策勳酒舒我壯士顏
團弊

見官皆良民見賊皆黃兵賊自稱黃兵昨日被賊虜今日同賊行東
邨卽抱西邨鬻阿弟禁脫阿姊繙暗中假手俵以牲遠賊歸洞
近賊耕秋收再約往賊營官團賊團淆不清甯甘送賊酒千觥
不願助官一斗杭順賊寡取官取盈愚民顧利不顧名事敗早
辦來投誠一人秉公九徇情瘦犬傍戶矜吠鳴轉於良馬加魚
烹懲前無復凶燄櫻陽奉陰違何日止恩威疇能臂使指我所
思渤海龔兗州李

練弊

團民畏賊不畏官練勇避賊還擾團日銀三分命豈賣所冀擄
掠周饑寒雷臺山上留舊癩萬壽堂前列名單乘機屈臣入隊
伍心既叵測言欺謾平居性懶例饕餮臨敵勢衆常呼譟賊之
焚擊有漏戶練所搜括七箸殫致民離叛每由此冒功乃濫叨

衣冠養鷹已飽遂思颺引虎自衛虞相殘殺不足懾彼魂魄賞
不足煖彼肺肝收已渙之民當猶易用散募之練良獨難

十一月十五夜坐月

殺賊歸來血洗刀

是日

牛城涼月照征袍野禽驚火穿林出餓

犬爭尸夾路嗥籌餉早愁黔地瘠乞師猶阻蜀山高羣公負氣
兵貪利戡亂憑誰勝算操

三坡

下三坡石壺關口虎牙磨

本名石虎對關如兩虎對踞

上三坡甘路寺前路旋

螺至瓦窰屏氣一歇行人淚與汗同竭右有大寨之山高接天
左有鍋廠之徑深若淵尋常過此肝膽裂何況兩軍相攻年元
光發卒熨道治貞觀開山二州珍置不將險要委蠻夷摧擴須
知古人意山岷種黍鋤沙積沙中往往拾斷戟上坡下坡休畏

難牛壁西南尚兵革

爬抓溪

爬抓溪脚爬復手抓天雨滑草晴滑沙徘徊數四得一步奔流
激石雙眼花客行未至先咨嗟陳公名鑿時以貴定來畏塗開
兩橋高拱克澹災道光戊戌記經始嗣有補修屢費財去年賊
議絕棧道川兵一戰戈盡倒險不可恃安思危凡事變更無已
時涉此溪者當知之

九盤子

山北路如槽山南路如磨郵亭塞其坳古佛苔蝕座雄風生半
空雲曳山光破仰攻犯矢石一守應萬挫隘官久已裁行旅坦
然過緬懷劉大刀奪險偉征播後來王節愨藉此集將佐王祥
九盤形勝人必爭豈宜防衛惰一盤一躊躇忘卻早行議

桐梓縣志卷二十 文徵志

十六

鄒神保攻城率團援衛感作

趙毓昭

無端草賊太猖狂梓里焚燒實可傷郊外團民皆向義城中兵
練豈知方千鎧閃閃明危堞萬戟林立女牆憶我趨庭年正
少恍如此境在襄陽

戊午重九懷趙石知

曾銳

艱危身世舊山河不上高臺淚已多久別有書難繫雁暫歸無
地可哇鵝隨風紅葉酣千樹戀日黃花澹一窩休把茱萸輕插
帽今年佳節少人過

虎峯山題壁

陳霞軒

誦經平好惡觀奕悟除乘忽憶巉巖藥披雲獨自登
腰橫百鍊刀不能抉瘕狗慧劍豈非虛暗中有掣肘
托迹萬山中無非欲避世何處是桃源殊難作隱蔽

遯荒無所爭豺虎徧當路其勢難兩全盡力莫退步

同治癸亥為縣令徐行幕賓未幾號匪破城各官逃散慶雲
在堞被戕

閱邸鈔知逆賊楊鳳伏誅

馮元靈

兩年宵旰聖躬勞九郡回環苦繹騷終見入林能得鹿豈容升
木敢教猱文臣籌畫行糧急武將周防戰壘高傳首仙芝休逸
豫盜源未靖逆渠逃

野人尚未獲

寄江大令玠侯

于鍾岳

憶昔蠻王洞妖氛一掃空以多能取勝每怒必成功此老文官
耳偏多大將風由來豪傑士不與眾人同

輓玠侯歌

山可傾海可平古人力與造化爭君不見江公搥碎蠻王洞山

開石破天驚比諸古人尤奇橫沿崖一戰寇東走蠻王之洞
石開口祖龍鞭山山不奔江公搏兔氣已吞霧積雲屯戰士擁
電掣雷轟石不動朝鑿石聲礧礧暮鑿石音空空移山之志如
愚公拔山之力如重瞳賁育氣盡舞陽死仇池乃與天相通洞
中殺氣振屋瓦將軍真如天上下烈炬萬點如燃犀晝多金鉏
夜鼓擊九天九地無此奇一步一戰羣醜攜將軍斬寇如斬草
寶刀切玉如切泥萬丈長纜何足掃男子不生王保保賊亦為
之滅山亦為之開天假雄才不假壽祚連高塚生蓬萊我歌蠻
王洞壯士皆悲哀夜深月黑風露吼疑是英靈助戰來

遊娘娘廟

相傳為侯忠烈良柱故宅

溫奎光

委鬼亂皇居羅鬼擾天府

三國志益州

萬骨堆北邙一將遺老

圍夷考有明季播川盛豺虎天生忠烈公特為靖疆土三載至

元戎一身百戰苦何時家屬遷故宅僧所取書院是范留佛寺
爲王與地本因人重蹟漸泯乎古豈同俗諺云千年換百主

臘月十四日蔣翼長

玉龍

克復桐梓喜作

溫耿光

王師四道出川東望救民殷水火中二十八番鏖虎旅一千餘
里奪蠶叢阨喉久悵三坡阻斷脊俄欣九埧空乘勢復城如破
竹旌旗晴徹逗東風

寄楊團首

正方

李文煥

我輩當團原是助官如其袖手何以除奸賊衆我寡報復何難
諸公熟思遠慮庶地方清寧而已亦不致於傷殘

石牛欄

趙春榮

行過夜郎城間隨輿夫睠天然一牛頭檻在石欄內

守城謳

楊秀江

桐梓縣志

卷二十

文徵志

十八

守城東魁崖草木影朦朧賊來不來多悲風守城西曲徑深深
黑石溪賊來不來風淒淒守城南溱水岸邊樹毵毵賊來不來
風正酣守城北虎頭峯頂昏如黑賊來不來風更亟城內守女
牆城外守隘口防堵越三冬苦辛亦已久富者破家貧者走但
願賊早平勿謂衆心可成城

河工告成喜賦長歌

李增春

浩浩滔天洪水時舜瞳墮淚堯愁眉上天不生神禹奇萬古中
國窟蛟螭書傳蒼水夢玄彝庚辰章亥託神祇天功實藉人力
爲泥輻山纒四載馳疏淪排決次第施八年手足忘胼胝巍巍
高樹岫嶺碑萬世安瀾衆賴之吾桐最爾荒邊陲漢郡唐州渺
難知國初至今患馮夷昏墊沈災民流離平田萬頃里瀘芝水
來千溪又萬溪葫蘆一洞如漏卮秋冬出入尙咸宜春夏水盛

吞吐遲頃刻汜濫成天池紅濤白浪翻城隍浸房灌屋漣淪漪
遠遷近徙萬戶悲老幼負戴苦攜提最憐十萬禾稻滋淹沒糜
爛化塗泥年豐夫餓妻啼饑歲歉無以供爨炊中丞黎公深嗟
咨撫軍撫民皆以慈聖賢豪傑不扶危乾坤六合成瘡痍太行
王屋且可移巨靈擘華任難辭或謂棟折榱傾欵大廈誠難獨
木支公曰否否吾在茲回天將以一手持爲民請命職所司竭
誠拜表達丹墀先輸內帑兼抽釐一勞永逸同歡嬉籌畫下令
鳩工垂鑿空混沌開河湄懸崖壁立鑽鋼錐攻以礮火霹靂隨
石破山崩天驚疑無險不鑿幽不錐五年礮鼓未停錘山澤通
氣孔洞披河伯往來無險巖水不壅遏下流卑有志竟成共怡
怡從此寸壤皆良菑桑麻樹滿高下陂稻粱黍稷甘如飴城鄉
安堵風恬熙飽食安坐敦書詩鄭國穿渠暗有欺李冰治灌良

足師雖然禹功未敢追如過河洛咸興思桐人幸逢唐虞期此
功端不頌臬夔明德深入人肝脾以後洽髓長淪肌區區何以
報恩私世世活我孫與兒爲公建立長生祠千秋萬歲神在斯